

Čedo Nišević, dipl. geod. inž.



Čedo Nišević rođen je 18. 4. 1936. godine u selu Niševići kod Prijedora. Osnovnu školu završio je u Omarskoj, a nakon toga dva razreda gimnazije završava u Prijedoru. Trogodišnje školovanje u Geodetskoj tehničkoj školi u Sarajevu okončao je 1958. godine. Prvo zaposlenje imao je u Prijedorskoj sekciji Geodetske uprave BiH, gdje ostaje do jeseni 1960. godine. Iste godine upisuje se kao redovni student prve generacije Više geodetske škole u Sarajevu. Školu je završio 28. 6. 1962. godine i postao prvi inženjer geodezije koji je diplomu stekao u Bosni i Hercegovini. Nakon toga je izvjesno vrijeme radio na geodetskim poslovima u Njemačkoj. Upisao je studij na Geodetsko-komunalnom odsjeku Fakulteta za arhitekturu, građevinarstvo i geodeziju Univerziteta u Ljubljani, koji uspješno završava 1968. godine i postaje diplomirani inženjer geodezije. Poslije toga dolazi u Prijedor, na dužnost direktora Općinske uprave za geodetske poslove i katastar i na toj funkciji ostaje sve do kraja 1972. godine. Godine 1973. postavljen je za direktora Općinske uprave za geodetske poslove i katastar Banja Luka i tu je dužnost obavljao kroz tri mandata (više nije mogao biti izabran po zakonu), tj. sve do kraja 1985. godine. Karijeru je nastavio u Urbanističkom zavodu grada Banja Luka, gdje ostaje do penzionisanja 1996. godine. Kao vanjski saradnik radio je u Građevinskoj školi

U Banjoj Luci je upoznao suprugu Nevenku s kojom je proveo skladan porodični život i dobio dva sina, Vladimira i Nikolu.

Umro je 2013. u Banjoj Luci i sahranjen na takozvanom Perduvovom groblju.

Kako smo desetak godina sarađivali, rekao bih da je bio veoma stručan u svom poslu, posebno u organizacionom pogledu, odmjeren, tih i pomalo povučen. Dao je izuzetan doprinos razvoju katastarskih ureda na čijem se čelu nalazio. Odmah po preuzimanju funkcije direktora uvidio je da se sa kadrovima koje je zatekao u katastru neće moći uspješno održavati novi premjer, pa je nastojao privući kadrove iz Geodetskog zavoda Sarajevo, radna jedinica Banja Luka. Na mjesto rukovodioca odsjeka za katastar primio je 1975. godine Iliju Lukića, geod. ing. a slijedeće godine je i mene primio za rukovodioca odsjeka za komunalne uređaje, a ujedno i zamjenika direktora. Zaposlio je iz spomenute radne jedinice više geometara i jednog geodetskog inženjera. Radili smo skupa na novoosnovanoj Geodetskoj školi u Banjoj Luci. Predavao je stručne predmete, sve dok škola nije primila dovoljan broj diplomiranih geodetskih inženjera u stalni radni odnos. Skupa smo izveli jednu generaciju geometara. Iz te generacije smo odabrali više najboljih učenika i zaposlili ih kao pripravnike, a kasnije su ostali da rade u katastru kao geometri.

Kemal Arnautović